

顯

志

堂

稿

顯志堂稿卷七

吳縣馮桂芬林一著

贈太子太保 武英殿大學士華陽卓公神道碑銘

稽古唐虞股肱耳目策之以翼爲明聽申之以予違汝弼曷
嘗有宰相諫官之分秦漢御史大夫爲宰相階猶爲近古唐
宋而後臺首始截然爲二甚則水火顧或起家諫垣累階政
府類能詳明憲令閑練程品執法無屈撓 國朝自御史爲
大學士者七人武定李文襄臨桂陳文恭功名尤著道光咸
豐間則推華陽文端卓公公諱秉恬字靜遠號海帆先世廣
東嘉應州人曾祖諱上雋遷安岳縣又遷四川之華陽遂占
籍焉曾祖妣周祖諱德秀妣謝考諱廷璋妣王三世皆以公

官

誥贈光祿大夫妣皆一品夫人廷璋公六子公其長也年十有九游庠其明年登賢書聯捷成進士選庶吉士授檢討丁母憂服除改山東道監察御史升吏科給事中巡東漕轉工科掌印給事中巡中城擢鴻臚寺少卿順天府府丞調奉天丁父憂服除授太僕寺少卿歷遷大理寺少卿太僕寺卿太常寺卿宗人府府丞內閣學士禮部左右侍郎吏部左侍郎都察院左都御史兼管順天府尹兵部戶部吏部尚書三署兵部尚書以吏部尚書協辦大學士拜 文淵閣大學士晉武英殿大學士管兵部調管戶部三庫又調戶部工部賞戴花翎六旬 賜壽 紫禁城騎馬咸豐五年九月三日

疾薨邸第遺疏上

天子憫悼 遣官致奠 贈太子太保 賜祭葬 予諡文
端 賞景濂景洵舉人先後典會試一典江南陝西試各一
視學奉天浙江各一典武會試一監臨武闈一 殿廷試讀
卷閱卷以十數

上調

陵留京辦事者七隨扈

慕陵讞獄陝西者各一充

高宗實錄館分校 國史館正總裁 玉牒館副總裁稽察
欽奉 上諭事件處 文淵閣直閣事稽查宗學東四旗覺
羅學公性孝友待諸弟若一與人交義以誠爲學有體有用

所條列規畫皆可見諸施行巡東漕時謂東省臨河以疏濬
泉源爲第一義親履泰安兗州諸境得四十三處命名勒石
至於今無廢其查宗學也疏言月課人少有名無實蓋以無
獎勵之故請將連列優等者記檔序補副管闕 廷議從之
宗學文風爲之丕變又疏陳川陝楚三省老林事自陝西之
略陽迤東至湖北之鄖西曰南山老林自陝西之甯羗迤南
而東貫四川境至湖北之保康曰巴山老林縱橫千餘里遼
闊而瘠瘠巒嶂重巒深林密菁厥種三品苞穀蕎豆燕麥三
省無業游民出錢數百賃種一溝一嶺僑居其中遷徙無定
蹤謂之棚民屯聚旣多良莠莫辨攘奪矯虔所在多有遇凶
饑一二奸民爲之倡蟻附蜂起三省地方官輒以華雜交錯

互相隱諱釀成大案莫職其咎請專設一監司治之議下督撫雖不果行而三省皆派員守邊云公當官執憲抨彈無所避入西臺首劾南陽府辦賑不善事又劾臨清軍營保員過濫知府金潮趙對墀以營私獲咎不宜捐復膺方面又奏大名滄州衛輝青州東昌武定徐州各屬官取財於捕役捕役取財於盜賊謂之月規是官取盜賊之財也請嚴禁

仁廟皆避之陝西革生徐登元以知縣王以銘侵帑冒賑狀於朝公以宗丞偕侍郎恩特亨額公奉

命往訊復言以銘捐修隄工輒以甫築復衝所糜之銀牽合冊報轉得議敘又失察鄉約購籐木索鋪戶錢皆不合而偷減城工事不實請褫以銘職而坐登元以誣兼京兆一職號

難治公初以左都御史蒞事汔於大拜凡十八年先後居是
職無如公久者不動聲色羣吏肅然百度具舉無纖毫過差
人以爲難往時九卿會議一二王公樞相主之以下率占位
畫諾惟謹公在列必侃侃正辭知無不言言無不盡於是
國家承平旣久槩芽萌伏而恬熙無改 朝列以雍容揄揚
爲職雖名御史得卿寺卽噤口爲六曹長貳無建言者公由
科道洵登揆席封事無虛月往往危言悚論不爲用事者所
喜而始終無易行蓋鯁直敢言其天性也

聖主亦知公深恩禮不少衰公工詩古文有集若干卷藏於
家門下士屢請刊行不許尤長奏議輒焚其稿雖家人子弟
不之見故不傳精於衡鑒乙未南闈爲名榜今詹事殷公兆

鏞其尤也愛士尤摯駐防壽生昌亦乙未榜考据詞章儔輩
罕儔匹未弱冠登賢書無何駐防停文試幾於禁錮桂芬主
江甯講席奇之抵京言於公慨然代輸金得筆帖式援駐防
京官子弟例與試遂中式入翰林其成就後進多此類公生
乾隆四十七年四月二十四日壽七十有四崛起田間弱齡
通籍歷事

三朝垂六十年功建名立生榮死哀可謂全德元配張夫人
父諱繼祖國學生生於乾隆四十三年十月十七日年二十
三于歸卒於嘉慶十九年四月二十日年三十七生子楨殤
樛庚子進士翰林院編修歷官吏部右侍郎女一殤繼配何
夫人曾祖諱焯 太子太保總督銜河南巡撫祖諱裕誠安

檄巡撫父諱金 召試舉人貴州按察使以乾隆五十四年

五月四日生道光十二年閏九月六日卒年四十四歸於公

凡十五年側室褚宜人生椿正一品廕生刑部員外郎女二

一殤孫九景澄山東候補道 賞戴花翎景濂丙辰進士吏

部主事 玉牒館議敘候升員外郎景洵 欽賜舉人 國

史館謄錄景沅候選縣丞景涵兵部員外郎景瀛國學生景

淮景洙景汶孫女一曾孫二煦然曾孫女四咸豐五年十月

二十五日樞等奉公殯葬於直隸昌平州黃土村聚福莊之

原以兩夫人祔禮也桂芬以考取教習出公門下又與公子

少宰樞同年公之葬也少宰寓狀吳門以隧道之文相屬狀

過略馳書求其詳未覆而少宰病卒逾三年桂芬入都公孫

景澄等述先志又以請桂芬尋以疾歸又逾年始得爲公銘

銘曰

南陽褒德中興輔翼冠冕東京越二千年續復前賢惟公繼
聲井維岷絡會昌建福蔚爲秀靈遂甯開先公實比肩瑞我
聖清爰在鱗歲嶄然早慧露爽英英鵬起扶搖鸞翔慶霄一
舉蓬瀛人中屈軼相百相十榻坐獨橫華蟲七章槐棘兩行
迪簡升庭偉姿闕議敏心強志大猷是經封符指期赫赫熙
熙枹鼓稀鳴

聖明嘉獎游陟師長金甌覆名貞厥素履以翊

天子羽儀承平世習泮泮依違廉謹公獨錚錚矯然不阿坦
然不頗砥柱崢嶸安危密疏遠謨長慮敷納詳明炳亮

三朝不磷不彫老成典型宜躋遐紀修塗遠已

九重悼驚宰樹藹春崇岡鬱雲護此佳城生維依

日功猶戀 闕慰公丹誠刻飾龍螭發揚聲詩萬古永貞

榮祿大夫 贈太常寺卿鹽運使銜福建興泉永兵備道會稽秦公神道碑銘

同治三年秋七月庚寅鹽運使銜福建興泉永兵備道會稽秦公卒於里第於是公將改官江南赴部引

見道里門會越郡大水東西兩江塘決千餘丈山會蕭三邑成巨浸公請開棟樹堰洩水築閘家堰等柴隄以免內灌月餘水始退僉謂兩塘之決二百年來因循憚興作所致失今不治禍且無窮乃叩當事奏免新賦並借帑十萬興工暑暘中規畫相度積勞疾作遂不起後數月塘成事

聞卹贈太常寺卿

子祭葬廕孫祖均官知縣公子曾熙以七年三月葬公平水

鄉游龍坂之原朱夫人耐禮也越五年以行狀來請刻銘於
神道余與公同年曾熙復從余游不敢辭公諱金鑑字厚齋
世爲會稽人曾祖惟仁候選都司祖文奎候選州同知父溥
山西太原縣典史三世皆以公官加四級 贈榮祿大夫曾
祖母高祖母王母俞皆 贈一品夫人兄弟三人公其仲也
以監生舉道光甲午京兆戊戌考取覺羅教習庚子成進士
以知縣籤分山東補高密癸卯甲辰兩充鄉試同考官修城
敘勞加知州銜丁內外艱服闋咸豐二年例選福建甯府
知府以勞績保道員七年護琉球貢使入

朝拜蟒衣之

賜七月調福州八年夏署鹽道籌餉議敘加運使銜賞花翎

先後檄署延建邵道與泉永道以省局冗要皆未赴六月再署鹽道十月授興泉永道未赴十年四月署糧道明年六月署按察使

詔舉賢才公被首選記名軍機會制府奉

命援浙以廈門賦稅總匯檄公督理浙餉遂赴本任旋因鹽道任失察商虧鑄級閩省肅清論功復職卒年五十有九

授中議大夫加四級晉榮祿大夫公居官清勤自矢開誠布公而機牙肆應遇事立斷高密車網魴鱗二村素頑梗公威德並施弊俗以革鄰邑膠州豪管大成繫獄自裁其家以杖笞訴上官褫州牧韓某職有鍛鍊之者檄公覆訊公廉得其實爲申辨復韓官時貴有族女適維縣劉氏女少寡無子家

鉅富爭嗣久不決大府檄公鞠之兩造皆輦金相覲覲一日將訊有董弁者來謁公延之坐而自出定讞以判詞入示董董遂巡退在高密五年挑五龍河修夷安書院士民德之再與分校能得士江督馬端愨公新貽其尤著也其知建甯也時粵賊初起距閩遠官吏泄泄然公下車卽籌團練親赴崇浦修治隘口未幾土匪四集公會延平各軍平之終公之任建無賊警公去賊始長驅入岑陽關兩攻建城衆數十萬皆賴公所練勇擊退人由是服公慮患之早松溪匪吳葉奴糾衆謀變爲期攻縣城公偵知之星馳勒兵入其巢穴諭以順逆禍福脅從皆散渠魁就縛事立定建甯崇安諸路皆產茶公請開出洋之禁益課數十萬建鎮平關於大武嶺以爲延

建屏藩閩省局稟病民

上命將軍督撫治其事會公知福州以委公公議局稟民不樂用致銀米驟貴十倍請停罷

報可民患賴除廈門俗悍地沿海無屏蔽公之任首禁械鬪毀竈場獲洋盜楊岸等誅之執土豪三十六人置諸法籍嘉禾鄉勇二千人日夕操演成勁軍民心大安永春州陶某縱役殃民民闕於州求殺役不許遂被戕州佐以竊發告公知其故曰是驅之叛矣手示令獻罪魁餘不問首惡遂得州以無事歲旱禱雨夷目妻過壇左與民爭道民以瓦石擊之夷目大恚將搆兵公怵以眾怒難犯事立解公之隨機張弛多此類公性孝友敦睦嘗以宗祠未立即故居改爲祠廉奉所

餘悉周親串歷官三十年起居如寒素自號強恕居士具經世才晚際時艱慷慨許國壯心未已中道徂謝不竟厥施海內惜之元配朱先公十七年卒 贈一品夫人繼配陳 封一品夫人側室中蔣江皆以曾熙官 贈封宜人子一卽曾熙同知銜江南高瀆縣知縣 賞戴花翎女二壻郎中王文謙一未字孫二祖均三品廕生候選知縣祖壻孫女一銘曰種山嶷嶷鑑湖湜湜鍾德美兮巍峩起家民望國華譽鵲起兮政成齊魯旌彰武歌樂只兮定榮決疑方圓具宜隨所履兮棠陰有頌柏臺無訟臻上理兮金隄巨虹我稼屢豐福桑梓兮廉衢方騁駿輪促景命適已兮化蝶招魂游龍返根永千祀兮

奉直大夫內閣中書加四級常熟叔巖曾君墓表

君諱熙文字酉生號叔巖系出宋右丞相魯國公懷始自福建路晉江縣遷常熟世爲縣人曾祖立誠縣庠生 敕封文林郎妣仲孺人祖濟乾隆甲辰進士河南羅山縣知縣 敕授文林郎妣張孺人父豫謙嘉慶辛酉舉人直隸清豐縣知縣在官有聲總督長白松筠公稱爲畿輔第一循吏手書中正二字以贈之 敕授文林郎妣錢孺人祖父兩世復以君官皆 晉贈奉直大夫妣皆宜人清豐君五子君第三年二十有三游庠道光壬辰舉於鄉乙未大挑二等候選教職尋以例得內閣中書君素恬澹春官屢薦不中第遂絕意進取家故在虞山下山水之窟也葺小園鑿池壘石時花種竹取

水經注語顏曰明瑟山莊課子讀書其中閒集里黨耆舊作詩酒之會以爲樂意泊如也無何粵賊陷金陵難民東下縣戒嚴於是有團練撫卹諸役當軸以招君君慨然偕仲兄仲才明經受事無役不從心力交瘁旣見金陵軍將驕卒惰賊益張內地郡縣恬嬉如平常輒與仲兄相持而泣曰事不可爲矣我輩無從避理速死爲幸不然者且汗賊刃聞者以爲狂旣而君卒其明年城陷明經殉難一如君言君天性孝友事生送死盡禮兄弟歿逾時而慟經紀後事甚至宗族戚黨僚友孤寒急難靡不恃君以濟購屋百椽撥腴田千畝將置義莊規模備具而卒誠之撰輩成之戊戌會試與中表歸君蘿汀借抵淮歸疾篤南旋君將從之同人不許行數十里心

動曰吾終不安也竟回車同返生平不苟取而服膺元儒語
魯齋先生之說不廢治生故羅山清豐仍世宰縣不名一錢
君不仕而家轉裕人兩賢之性嚴正絕聲色之嗜海虞俗素
樸無狹邪聞警以後有自他郡避難至者闔里靡然惑之雖
士大夫亦不免或誘君往比至始覺之立拂衣出君於是愀
然有人心世道之憂謂吾鄉數百年風氣醇謹不可及吾世
而壞之作詩以規同人詩存集中噫可敬也已君詩文豪邁
有奇氣著有明瑟山莊集八卷制藝若干首行世以咸豐九
年正月卒年五十有八 誥授奉直大夫內閣中書加四級
元配錢氏 誥贈宜人某女爲君母之姪生子二憲章日章
日章爲君弟銓文後皆前卒女一適八品銜季燧章繼配丁

氏 誥封孺人某女生子二之撰候選郎中寶章庠生女四
一殤二未字一字吳某之撰等以同治七年冬十有一月某
日奉君及錢宜人匱葬於縣之拂水岩東北之原齋行狀請
表其墓余與君同郡同鄉舉又夙重君爰爲詮次君行事榮
榮大者俾道諸石云

光祿大夫東閣大學士文恪王公墓志銘

代

道光二十有四年四月戊申晦 太子太師東閣大學士蒲城王公薨於位於是公自河上還 朝僅逾月謁假不視事 養痾園邸行愈矣卒以不起遺疏上

天子軫悼

命王大臣賜奠者再 贈太保謚文恪入祀賢良祠飾終之典視常例有加孤子沆將以明年某月日奉公柩歸葬於邑城之西南忽家村先期賫行狀踵子門再拜誦首泣而請銘無以辭按狀公諱鼎字省厓系出山西太原好古公信以孝廉官陝西宜君縣教諭爲遷陝始祖占籍蒲城世以科第顯曾祖垣乾隆丙辰舉博學鴻詞辛酉舉人祖夢祖恩貢生考

授直隸州州判舉孝廉方正祀鄉賢父鎮太學生封贈皆如
公官曾祖妣路祖妣原趙妣原皆贈一品夫人公年十九補
諸生乾隆五十七年舉於鄉嘉慶元年成進士選庶吉士與
修

高宗實錄請亟歸旋丁母憂服除授編修遷右贊善歷洗馬
侍講侍讀左右庶子侍講學士侍讀學士少詹事詹事凡十
遷至內閣學士時十八年也其明年授工部侍郎明年調吏
部旋調戶部禮部刑部嗣是迭居五部爲戶部右侍郎者三
爲刑部左侍郎者再二十三年管順天府尹事充 經筵講
官二十五年

仁宗崩開 實錄館公爲副總裁道光二年擢都察院左都

御史是年秋出署河南巡撫閏三月以父憂去官五年服除
以一品銜署戶部左侍郎尋充軍機大臣

賜紫禁城騎馬署工部尚書六年授戶部尚書七年西陲用
兵

上以公運籌有勞加太子少保明年事平賞戴花翎十
一年出署直隸總督還兼管刑部事十五年協辦大學士十
八年授眞二十年晉太子太保二十二年出署東河河道
總督以塞河功晉太子太師公爲人謙退而臨事侃侃審
直不阿起家寒賤登相位歷事

兩朝以端方正直結

主知入贊樞密垂二十載歷四考皆蒙甄敘雖造辟陳詞轉

團密勿外人莫由聞知而立朝大節嘖嘖在人口一視學江
西一分校會試再主浙江鄉試四主順天鄉試三主會試所
得多傑士在戶部十年綜核出入吏莫能欺軍機百政之總
昕夕入侍不暇問他事故事樞臣領部職者視成而已公筦
刑部最久總覽鉅細閱常牘必竟多所平反置吏有疑獄輒
命公馳傳案問先後歷九省讞獄三十餘多得其實有所彈
劾雖大吏無少瞻徇浙江德清民婦甲與乙私爲乙婦丙覺
懼洩殺丙賄官吏以免丙母家訟冤獄三年不決公之再典
浙江試也陞辭

上以獄付公入境偵知其家故豪於資以訟耗大半公曰是
賄據也訊之具服官吏皆抵法浙人頌神明焉兩淮鹽務敝

壞積虧正雜課以千萬計至歲將盡而前歲綱未集

上命公往勘公疏請節浮費革板窩裁總商定桶稱編船號
疏運道散輪規酌帶銷數事大恠謂商本輕則鹽價自賤私
販不緝而自消舊欠紆則新綱可清積壓無因以藉口且以
疏銷巡緝責在州縣汎弁而鹽政非所屬令或格不行請裁
鹽政由總督兼轄

上皆允其請十數年來淮綱得稍振者公之力也二十二年
秋河決開封公奉

命往視時議者以水勢方張不宜塞且請遷行省以避其衝
公持不可疏言河水方灌歸德陳州安徽毫潁合淮東注洪
澤湖湖底日受淤萬一宣洩不及則高堰危高堰危則淮揚

一帶盡成巨浸江之北河之南數百萬生靈飽魚鼈矣無論
舍舊址築新隄自豫達海將數千里工費不可數計且自古
無任黃水橫流南趨之理請飭戶部速具帑期以冬春之交
集事不效願執其咎且具陳民情安土重遷省垣可守狀初
公至汴城四面皆水旦夕且圯公率僚屬禱於神躬督吏卒
晝夜巡護獲無恙洎工興親駐工次星宿露飯披閱案牘燈
熒熒達曙倦則寐肩輿中未返行館者八日先後六閱月而
蕙事糜帑金六百萬有奇僉謂財用之節成功之速前此未
有也時公舊疾屢作憊甚或以節勞諷公不聽及隄成而公
疾殆矣悲夫公性至孝甫通籍而太夫人薨常恨不逮奉養
光祿公居京邸承歡無違色少食貧既貴不改寒素奉入所

餘輒以贍親友甞之日廩無餘粟拋無新衣清操介然外吏入都或公輜軒所至餽方物雖故舊不受生平不受人講託亦不請託於人公餘必讀儒先書撫碑帖爲娛著作甚富不存稿蓋不欲以文字見也公生於乾隆三十三年二月三日薨年七十有五母弟紱廩貢生光祿寺署正元配原夫人次配徐夫人今夫人孟氏子三人麟駒海官殤沆道光庚子科進士翰林院編修女三人長適庠生崔光笏次適河南候補同知屈文台季適原啟文孫男三人璵瑄瑩孫女一人銘曰峩峩太華西陲是障矯矯我公中朝之望公忠篤棗外和內剛溫溫燕處諤諤朝堂維誠維一上格我

皇入佐

萬幾調護維匡造陞啟沃外廷莫詳功在天下不耀而章欸
關英蕩簡書不違九州歷半駢牡周行往秋八月命塞宣房
單車河壩載塗雪霜忘餐廢寢心悴形尪狂瀾手挽蛟龍遁
藏鉅工旣葺臣精則亡梁木遽壞輔星斂芒

天子曰嗟失我元良愍飾之贈有逾典常梧楸葱蔚龍原之
陽

聖清賢相卜是崇岡幽宅云吉奕葉永昌

光祿大夫太傅 武英殿大學士文恭潘公墓志銘

咸豐四年夏四月己巳朔越二十日戊子太傅大學士吳縣潘公薨於京第疏聞

上震悼

命怡親王致奠卹典視例有加入祀賢良祠諡之曰文恭是秋公子少宰曾瑩等奉喪南還冢孫儀鳳逆江上旣歸用吾鄉宋文恪韓文懿舊事入城殯於第治喪逾三月夫人汪氏繼薨將以五年三月丁丑合葬於元和縣二十三都四圖貴字圩光祿公塋之次啟謝夫人兆而同窆焉曾瑩等齋公年譜汪夫人狀授桂芬援漢陳熾立楊太尉碑之例屬銘不獲辭謹案公諱世恩初名世輔字槐堂號芝軒潘氏系出唐欽

州刺史逢時居官有惠政秩滿父老攀留遂家於歙越若干傳至公六世祖諱仲蘭明末遷於吳

皇贈內閣中書五世祖諱景文錢塘縣歲貢生以商籍故隸浙江高祖諱兆鼎歲貢生松陽縣訓導曾祖諱隨貢生祖諱冕候選布政司理問考諱奕基附貢生 四庫全書館議敘

州同知始自錢塘改籍吳縣曾祖以下 贈封皆如公官曾

祖妣戴祖妣汪妣黃皆一品夫人封公二子長諱世榮乾隆甲寅舉人內閣中書爲仲父乾隆甲辰進士刑部陝西司郎中諱奕藻後公其次也大父夢一麒麟墮地化爲嬰兒俄而告公生年十有六應童試郡守胡公世銓拔第一評其卷有安排作狀元宰相語是年補諸生越二年食餼乾隆五十有

七年舉於鄉次年成一甲一名進士授修撰六十年留館嘉慶二年大考第二升侍讀時故相某當國公既以青年上第負重望及是試館職又高等益有意招致之令所私道指公拒不與通會學士關公於次當選屏其疏六閱月不上

仁廟親政得其狀立擢公侍講學士轉侍讀學士海升少詹事詹事內閣學士一年中自五品驟登二品嚮用自此始矣六年遷禮部右侍郎嗣是真除權攝周於六官十有七年授工部尚書尋調戶部十有九年丁黃太夫人憂服除以封公春秋高不忍遠離卽家具疏乞養

聖主鑒其孝思不深譴也降侍郎仍允所請道光四年丁封公憂七年服除補吏部左侍郎遷都察院左都御史十年再

授工部尚書先後迭署吏禮工三部其明年改吏部十有三年拜 體仁閣大學士兼管戶部尋調兵部其明年充軍機大臣又明年充翰林院掌院學士調管工部進 東閣大學士復調戶部十有六年充

上書房總師傅十有七年加 太子太保十有八年進武英殿大學士 賞戴花翎二十有八年晉太傅其明年引疾乞休疏三上

溫旨慰留僅解機務遂巡至今

上朝又三疏始得 予告食全俸仍就養公子邸凡五年薨公生乾隆三十有四年十二月二十一日壽八十有六公前後典會試四典順天試二浙江試一視學雲南浙江江西各

一分校曾試一教習庶吉士五 殿廷考第文字無役不從
經筵日講各館之屬所領職年除歲改以數十計初

賜紫禁城騎馬繼

命乘轎

賜第海澱 內廷給扶

賞穿黃馬褂用紫韁再

賜壽重與鹿鳴恩榮兩宴先後延賓子若孫有差

賜御筆熙載延祺三朝耆碩瓊林人瑞三額楹聯二歲時

頒上方珍異不可勝紀歷五考上敘大拜不階協辦樞廷不

始學習一出於異數 國朝以來生加太傅者五人重宴瓊

林者八人 廷試第一官大學士者八人惟公兼之至歷事

四朝則 昭代一人而已厥惟我 國家太和元氣細縑磅
礪之既久蔚爲人瑞委祉於公亦惟公鉅人長德爲足以逢
將而承迓之俾無顛隕於乎盛矣公爲治贊元經體不爲聲
章不苛細微其所設張舉措務持大體而要於不欺所取士
以千數名臣碩儒相望視學有治聲在雲南革新生紅案銀
在江西絕替考之弊所部肅然時擔匪邊錢會匪蹤跡出沒
無已公廉得其實密以聞在浙江值蔡牽黃葵之亂亦如之
繼以樞相總戶部最久中外條列農政

上以付公所持論務見其大黑龍江將軍請增都爾博特六
屯公議地當游牧開墾非利也不可許言官奏山東鹽課請
歸地丁公議山東場窳半毘連淮境一歸地丁聽民自運自

銷官私漫無稽覈必爲兩淮引課之累請寢其奏公之卓見多此類性厚重不泄洎入樞垣益慎密十有七年之間不與置吏交一牘上前所陳奏或有所論薦非宣示終不以告人雖家人子弟不聞不知故公相業之大者人莫能窺也道光之末粵匪始孽芽擾嶺以西諸郡會

上卽位詔舉人才公疏薦林文忠公姚公瑩才可辦賊時公已在告瀕去位猶力疾繕疏薦賢爲國若是卽公生平可見矣旣而

上起文忠督師尋道病卒姚公亦游擢廣西臬司繼沒無何賊益橫籌兵籌餉時事日棘公雖退閒見邸報日夕憂憤寢食俱廢寢以不起口授遺疏惓惓君國聲淚俱下悲夫公

事親孝居兩喪年且老日作孺子泣中間奉封公家居晨羞
夕膳色養怡怡若將終身春時梅花盛放從封公御藍輿郊
外徧探鄧尉西磧天平萬笏林寒山千尺雪諸勝或泛舟山
塘借子姓掖封公步虎阜薄暮載花而歸如是者十餘年爲
學一本程朱而不爲門戶之見嘗取周子至李二曲四十三
家之言擷精華要爲正學編一書與讀史鏡古編皆歸養時
作經封公鑒定者餘事爲詩文卓然成家公存心澤物公子
曾沂居鄉承公之志糾族立義莊歲小歉輒弛佃租至以饋
貧盡公之產與吾吳麥舟故事後先輝映公平居貌慊慊若
不及而當官軒然不可干以私絕苞苴謝請寄門闌怡然退
食簾閣據几手一編爲常服御如平人薨之日邸無侍餘至

稱貸以歸其喪可重也已著有有真意齋文一卷思補齋詩
集六卷正學編一卷讀史鏡古編三十二卷 熙朝宰輔錄
二卷思補齋筆記八卷公初娶候選州同知謝公長源女
贈一品夫人淑慎其德稟命不融歸公僅四年生於乾隆三
十有七年九月四日終於五十有七年四月四日年二十有
一以嘉慶二十年十一月從葬姑塋至是四十年矣後娶候
選知府汪公爲仁女 封一品夫人公及第後歸娶時年十
有七生而貴富相莊六十載夫榮子繼重封極品醇德備社
克儷於公爲人孝敬慈惠居卑尊問莫不法式視子女如一
無纖毫厚薄天資好善矧卹人恐不逮在京邸捐金建蘇太
義園他善舉稱是曾瑩曾璋同時爲刑部堂司誠之曰刑官

可造孽亦可造福慎之哉以乾隆四十有三年九月二十九日生以咸豐四年十二月二十九日薨享年七十有七公子五曾沂嘉慶丙子舉人內閣中書議敘光祿寺署正謝夫人出曾獻殤曾瑩道光辛丑進士翰林院編修歷官吏部左侍郎曾綬道光庚子舉人內閣侍讀 賞戴花翎汪夫人出曾瑋

特旨賞員外郎升刑部福建司郎中側室張恭人出女五謝夫人出者一汪夫人出者三側室黃孺人出者一汪學源汪嘉森汪樞汪嘉梓汪德英其壻也孫十二庭誥殤承重者儀鳳正一品廕生祖同四品廕生 欽賜舉人考取國子監學正學錄 欽賜進士祖蔭 欽賜舉人咸豐壬子一甲三名

進士翰林院侍讀祖福殤祖喜光祿寺署正祖保 欽賜舉

人國子監學正學錄祖楨祖謙祖均祖疇祖頤孫女六孫女
婿韓文和汪廷標蔣鎔經汪克昌其一字汪乃昌一未字曾
孫一成穀曾孫女一銘曰

繫周季孫畢公之子食采于潘因地爲氏望分河南吳由歙
徙潛久而光乃復其始

聖清紹統垂二百春秀孕川嶽靈降星辰元氣和會篤生偉
人翊我

鼎祚鬱爲寶臣公起巴閬早端始進捷徑終南拒之惟峻鯁
入鮒居冰山一瞬泰華峩峩壁立千仞爰贊機務爰正台端
以第一人爲第一官威鳳不搏瀛海無垠崇闕廣大冲夷粹

温有煒

綸言一心一德維匡調娛嘉謨造辟密勿論思外廷莫測霖
雨天下雲興無迹公在中歲孺慕不移陳情一表養志十棋
變除再起遂許驅馳式是

聖訓忠孝無歧古三師官位宰相右瓊宴重來黃扉龍首得
一於茲盛事不朽美具難并曠代誰偶惟公勳業肩袂臯夔
惟公文章胚胎書詩懸車依 輦養邱棧遲皤皤黃髮憂
國成絲天不憖遺山頽梁壞

至尊悼之飾終典最

四朝元老千載一會風度典型邈矣難再貴圩原敞譚經水
淙和陽沖陰

賜肝在中潔齊萬善賢相之宮韋平繼武慶流無窮

按察司銜署安祿廬鳳穎道天津剛愍金公墓志銘

粵賊所至旁近數百里間輒自亂自潰如蝸蟻沸羹而賊亦旋至汔於不守雖吳越馴弱之地皆然矧江之北淮之南民風剽輕平時所稱盜藪哉乃癸丑之變劇寇蔓延而於四境羣盜蜂起獨能以偏隅展轉枝梧五年之久廣袤千餘里中屹然不可動搖者誰之功與曰故署廬鳳道天津金公公諱光筋字念直號濂石系出漢中山王劉氏世居浙江山陰縣五代時避錢鏐嫌名爲今姓七世祖諱士英明季官北直薊鎮標守備殉闖賊難子諱士芳八齡隨母家天津遂占籍焉再傳至曾祖諱承基曾祖母徐祖諱哭祖母胡父名鎔道光乙酉舉人知州銜江蘇睢甯縣知縣母田三代皆 贈封如

公官公屢困童試家貧授徒自給封公官江南公奉胡太夫
人就養解齋留心吏治箋注律例成帙爲法家所服尋以例
得通判發甘肅署巴燕戎格通判往時回番爲民害官率不
問公獨往捕之傷於臂蓋公愛民嫉惡爲性一生建樹兆端
於此久之改安徽知縣會大水青陽民以督賦急將爲變撫
部檄公往視之公單騎至呼父老曉以大義陳說利害民感
畏事遂解署定遠縣故多盜公巡鄉甚寒暑若小疾無間捕
治輒滿品盜風稍戢民安之尋補建平復調定遠鑪橋土匪
陳小喚子暴鄉里公下車手刃之民大快移壽州公見獄囚
衆晝夜讞鞠旬日結案九十餘獄一空咸豐二年冬旌德呂
文節公薦公才

命赴軍營大吏以寇近州劇留之明年春安慶陷州聞警奸民聚語將爲亂公自鄉馳歸夜漏三下入城始不敢發獄囚有逾垣者手戮數人詰旦集紳士議團練不數日戰守之具皆完定遠匪陸霞林自安慶獄逸出糾黨數千大掠於壽州合肥定遠之邊撫部周文忠公親剿之檄公堵截公率勇入賊巢擒霞林父子五人其黨四十餘人送行轅迎謁文忠突出抱持公襦其冠易以花翎藍頂冠曰好朋友公大驚文忠曰霞林巨憨吾慮其南連粵匪爲大患故星夜督兵來君乃探囊取之吾何憂遂專疏薦舉奉

旨賞戴花翎以知府用旣而賊連陷臨淮鳳陽懷遠皆距壽百餘里民一夕數驚公令兩河口以東植竹籤置水營八公

山以北雜張旗幟嶺腰林杪皆徧爲疑兵山隘分列礮石州
匪談家寶鳳臺匪張茂皆嘯聚數千人公降之後皆效死是
冬廬州陷江忠愍公死之四年春六安繼陷州於是乎四面
皆賊距城六十里有正陽關爲自南而北之門戶賊大舉犯
關公據關爲營迎擊戰酣雨大至火器不熱賊又一軍自旁
來公曰天也欲死之左右曰公死城必陷今退入城城陷死
未晚公然之多設疑陣聲東擊西且前且卻遂退經一水無
舟不得渡頃之居民拏小舟來曰小人有母妻及子買此舟
以避難也子號哭不行而止天殆遺此舟以渡我賢父母乎
遂全師而濟賊疑有伏亦退賊先後凡五犯關公輒截之大
軍攻廬州無後顧憂者公力也于家園匪季學盛集眾數千

聯絡數十里儼然巨寇公先後七閱月督兵再舉始殲焉時
又有馬四馬五陳常四汪履祥吳雲程尹傳貴等在州境及
定遠六安霍邱合肥境者不下數十股皆劇賊蓄黨千百計
兩年中公不分畛域次第討平之次年大軍復廬州大府選
公爲守壽民請留公宵分輕騎出城廂燈火熒熒見公去多
泣者公亦爲之淚下一日抵暮廬城火起公馳救令曰譁者
斬一人譁擒之又指跣足婦四令并擒之皆賊謀合肥匪顧
四匿城中公丙夜潛出署至其處誅之無知者民咸以爲神
六年大旱蝗赤地千里公設局平糶下其法於新復之無爲
巢廬諸處全活以十萬計剿巨匪王亮彩鄧三虎三虎尤悍
煽飢民爲亂公手刺之馬上旣誅威震遠邇奸民無復逞者

撫部福公濟列治行以聞奉

旨以道員記名冬署廬鳳潁道至臨淮張捻等已破周鎮王莊犯三十鋪公渡河賊遁無何賊數萬騎千餘大至縱橫四十里公背水爲陣令曰進則生退則死死於敵不勝死於水邪眾曰然遂分三路迎戰公手燃大礮誤擊地地陷祭礮復發血流二三里賊佯走公傳令勿追賊旋從左右兜圍公令中軍截擊之賊後隊踵至又令左右軍合擊之呼聲動天地無不一當百賊大敗死者無算是役也俘云起事來未經此大創公兵纔八百人無一傷者眾以爲有神助頃之無爲巢縣復陷其明年春撫部檄守柘臯柘臯廬之屏障也會疾作檄回臨淮二月龔捻蘇捻大掠正陽關左側公扶疾出師追

剿半日行七十里至霍邱與賊戰於郊援賊大至呼城中并力不應乃退未幾霍邱陷桐城賊突圍出破六安水陸並進直抵關眾議多寡不敵守壽州恐不支不如退保臨淮全廬州後路公曰是怯也賊且輕我必守壽州賊必懼我攝其後若不支有死而已遂入壽公是時已統帶陝甘壽春四川各營兵而在部下則僅千人民望見公旌纛迎呼聲滿山谷公曰無恐吾與此城存亡耳入城賊圍之數匝城中知公至皆攘臂登陴輸芻糧治守具不令而集台勇目李士甲等縋城出賊方食譟而乘之敗賊南門外眾以賊地雷爲憂公用地聽法應之果驗地聽者掘深壑置水甕浮銅鉦其上令潛者伏聽之賊穴城外卽銅鉦作水漾聲始見墨子蓋古法云一

日藥局火公從容偵獲數十賊謀斬之賊攻城多死公令城上多列旗幟而數易之時募死士夜入賊營取一二首級賊輒夜驚有聲公曰懼我矣圍城之八夕星暗雲迷銜枚出師設伏八公山爲應分三道襲賊營賊驚逸而入公山火起賊自相踐踏轉戰終夕賊壘悉平遲明見積尸滿野遺屍百車敎功加按察使銜公遂進攻正陽自唐家店至枸杞園毀賊營三擒逆首吳守剛張定邦楊得應等進師三十鋪令知縣劉錫齡守備黃鳴鏢游擊成桂吉昌率水師會於黃天澗毀賊營四十餘殺四千餘人淮水盡赤水陸環攻五晝夜三登三卻平旦復登遂復正陽關

賞鏢色巴圖魯勇號無何張捻等自三河夾東犯公沿淮拒

戰互有勝負粵賊偵公在外潛師復陷正陽公聞馳還至沫
河口屠家窰見賊營四一鼓下之直搗北關屢戰屢勝會都
統勝公保師抵八里梁隔河而軍公晉謁議造浮橋渡騎兵
未成賊突至勝公檄公迎戰公在舟中左持矛右握蘇一躍
登岸兵凡千人自辰至未戰不利左右奪公胄請走公不許
轉戰渡河而歿時咸豐七年閏五月四日也公生於嘉慶二
十一年某月某日春秋四十有二公尸屹立水中顏色如生
弁兵護之歸壽民皆縞素哭失聲前一夕營西北有大星隕
公曰不日恐折一大將乃自應之悲夫州有童謠云小將不
如老將勝西風吹斷壽陽橋及是果應事聞

上嘉悼

命視布政使陣亡例賜卹世襲騎都尉諡剛愍祀昭忠建專祠公忠孝本於天性嘗謂弟思度耀庚曰時事日棘吾必死雙親春秋高侍養事汝二人任之矣言訖淚下又謂幕賓汪君榮桂曰吾自英夷兵起便以身許

國何待今日哉節儉廉潔守正不阿軍興廳事不設讌妻子或彌月不相見在軍食藜藿藉草蓐與士卒同甘苦蠲一切陋規所至御供帳曰我取於彼彼取於民民方倒懸不救之轉累之乎大帥行營距不百里不通一粟以是失大帥心在壽州某觀察巡河從者求站費公欲置諸法乞哀乃釋之初至廬廬新復大兵未去或奪民財公懲以法卒結隊入城公亦率兵與巷戰卒不能勝始服罪翼日負荆大帥門大帥笑

謝之舉僚屬極愼曰中人以下無不以得失爲心稍靳之使有所羨斯可盡其力用兵善持重多勝少敗賊畏公比之黑虎追賊正陽關外所過隘口賊皆粉書畏服君威幸勿窮追字公之入壽州賊首陳玉成聞跌足曰事不濟矣令其下裹糧而宿夜聞風葉聲輒起視云其論兵有曰上則操必勝之術次則立不敗之地上雖高於次次實要於上兵法所謂先爲不可勝以待敵之可勝也上書大府論時弊略言大兵宜攻不宜守地方官宜守四境不宜守孤城時皆以爲名言戰勝歸輒愀然不樂曰死者皆民也甘心爲賊者十之一二耳軍暇賦詩見志有古名將風愛民如子壽民感之誕曰萬家香火以爲常丹旄出臨淮五河送祭者几數千人蓋功德入

於人心有如此配郭夫人津庠生象謙女子厚增候選直隸
州知州襲世職女二長字張郁昌次未字先是封公侍胡太
夫人寓蘇州道梗未北歸厚增奉公殯至蘇卜以某月日葬
於吳縣某原以祖命賫行狀來乞銘墓余子芳緝與厚增爲
僚壻表章忠義又夙志也不敢辭銘曰

雕悍之俗崇遠之區豺虎一縱先之羣狐沸騰煽熾憂不可
圖碾碾金公傲若有餘指揮料量苗薈髮梳博碁九子轉之
覆孟握蛇騎虎目藜口茶隻手措拄五載崎嶇在垣有寇井
里晏如功在江淮豈惟鳳廬壽城十雉箕稗空虛焦炊戶汲
梁欄松芻薰以積火偵以瓶壺凡八晝夜法墨窮輪開關延
敵起煨舊呼峩峩正陽雄絕當途懸布一躍拉朽摧枯焚焚

羣兇嫉公剝膚蜂屯蟻聚有億其徒牽圍鋒林雨矢星珠彼
淮之陽萬隊貔羆霽雲嚙指援澗力孤張奪慷慨邊決先驅
在險彌亮臨危不渝仇身飛鏃誓命清渠大星宵隕陽曦晝
糊街號巷哭幼攜老扶公之矢志與捧檄俱龍淵太阿謂汝
知子雙門並擬乃白不朱長城旣壞

至尊悼吁飾終之典常儀有逾北行道蕪營窆姑蘇九龍蜿
蟠環護幽墟忠魂毅魄聿安厥居英風萬古重我三吳

四川候補道嘉定府知府李君墓誌銘

宣城李兵部之郇來余門齋其先人我同年雲生觀察君暨周太淑人行述請銘墓且曰先大夫之卒也先太淑人卒之郇將扶匱歸葬侍先大父於家尋聞先大父卒又賊陷宣城不得歸兵燹中放隘南下僅得至吳門旅厝石湖之濱嗣侍母宦京師未六年復棄養之郇今奉喪來先大父暨前母陳孔兩淑人皆前葬宣城茲卜地某原將以某年某月日葬我先大夫而以先太淑人耐當世知先大夫者無逾先生敢以請余辭之不獲按述君諱文瀚字蓮舫號雲生系出宋忠顯公芾以節度使隱居宣城橫岡橋遂占籍焉十三傳至曾祖諱元妣俞祖諱學孝庠生妣馬考諱光照庠生妣方徐三世

皆以君官加四級 贈資政大夫妣皆夫人 兄弟二人君其
長也年二十游庠道光八年舉於鄉充覺羅正黃旗教習期
滿以知縣分發陝西補岐山調長安歷署郿城固鄠大荔縣
事充己酉壬子陝西同考官敘修城勞加六品銜舉卓異又
獲鄰境盜以知州用升鄜州直隸州知州咸豐初元
詔舉賢才巡撫華亭張溫和公疏薦

召對乾清宮稱

旨擢四川成都府遺缺知府補嘉定署夔州捐升道員留川
補用遂卒君居官清介多惠政機牙肆應遇艱鉅立斷鄂縣
修城故事責諸民間君至而革之捐廉從事又籌款爲歲修
資鄂人德之邠州煤井備蜀人輒不得脫并親屬不與相見

君廉得其實出童子四人抵主家罪岐山旱舉賑罄社倉穀不足捐廉爲倡紳富應如響驟得錢數萬緡邑以無饑又上書巡撫侯官林文忠公言賑事凡萬餘言附以新樂府數十首代監門之繪文忠深納之洎嘉定時粵匪再陷武昌全蜀戒嚴君至葦濠塹儲糗糧庀器械激勵兵民凡旬日壁壘一新大吏覘而異之以夔州尤要隘檄署夔州治戰守具畢回嘉定會猺夷犯郡南峩邊一帶君立督兵掩擊斬渠魁五人餘眾棄甲降凡五日事平夔州瞿塘灘歲溺人無算君創設救生船數十行李賴之君料事有遠識將去秦作關中戰守策二十八條留上大吏所言多驗岐山之饑創議以工代賑浚池築堡厥後回匪之警賴以無虞君既卒賊圍嘉定經月

不得違而去守兵多君所遺也君馭吏嚴無敢舞弊者盡心
緝捕所至荏苒屏迹喜延攬後進分技能得士幼食貧有至
性年十有二失恃哀毀如成人稍長爲蠶吏司牋奏以養弟
文浚卒於京邸君視含殮一慟幾殆官秦中迎封君養於署
三年以不習水土歸厥後僅一歸省會中原多故桑梓烽烟
迴首黯然思慕成疾以捐升開缺爲歸養地而疾已亟臨歿
猶以爲憾少以詩古文詞雄於時餘事知音律工畫尤善寫
蘭朝鮮人有以百金購之者君卒以咸豐六年二月八日年
五十有二授中憲大夫以之郇官加四級 贈中議大夫
箸有味塵軒文集四卷詩集二十四卷樂府二卷詞二卷治
岐撮要二卷守嘉州紀要二卷鄂縣修城記一卷傳奇四種

行世配陳淑人湖北麻城縣知縣諱詩女繼孔淑人廩生諱
某女繼周太淑人先世自濠州遷常州曾祖諱溱祖諱情皆
贈奉直大夫考諱儀暉嘉慶甲子科舉人陝西山陽縣知縣
太淑人生而端穎山陽君以詩名江南目濡耳染不學而能
尤究心內則女誠山陽君先爲宣城校官識君諸生中以太
淑人妻之年二十有匹來歸隨人秦孝事君舅躬親中饋率
婢媪於廨舍隙地藝桑種菜課蠶紡績以爲常凡紉箴施表
之事必自爲之節儉逾寒素一布裙十年不易而戚鄰稱貸
未嘗辭爲山陽君梓行夫椒山館集課之卹讀佐塾師所不
及亦工畫有甌香館遺意箸詩詞若干卷藏於家同治五年
十月五日卒於京邸年五十有三 封恭人 晉封太淑人

生子二午生殤次卽之郇兵部武選司郎中君簞室邢生子
一世禧殤孫二同壽殤元凱孫女一銘曰

君才槃槃世絕特早歲詩名滿南國文章經濟原本一三秦
兩蜀振厥職乃恬乃謳萬口溢長衢方騁日西匿旣固旣安
君之室更千百年銘不泐

奉政大夫安徽補用同知直隸州署六安州事卹贈雲騎尉
世職元和金君墓碑銘

咸豐七年春二月賊陷六安署知州事元和金君死之

詔贈雲騎尉世職

賜卹如例將葬孤肇元等治碑請銘余與君同里同鄉舉肇
元爲余女夫不能辭君諱寶樹字仲珊號吟香系出宋將仕
郎璣二十有一傳爲君曾祖嘉禮議敘州同祖景祥吳庠生
從父勉之無子承兩祧始遷郡城花谿占籍元和箸有文選
音義二卷春暉堂文集四卷君始刊行之以君官 贈奉
政大夫考守樸監生 贈奉政大夫妣王宜人無子妣汪太
宜人生子三君其仲也年十六游庠道光十二年舉於鄉十

八年成進士得湖北卽用知縣十九年署興國州事君以仁愛爲治待士如生徒儀門舊累石爲樓以形家言不利於官毀之顧十餘年不發榜君復其舊卒無他而春闈有捷者二十一年補利川逾年調通山邑在萬山中民藝麻植茶爲業茶以充貢老幼負筐篋擁南榮下相忘如市集歲時張燈滿城鼓吹達旦君以舊俗聽之戒官人無擾民益喜男婦熙熙有上古氣象日判牘一炊頃衙散門庭如水吟咏外無事解故卽山爲亭問率家人輩奉太宜人板輿升眺鞠臚上壽蓋君於是時爲最樂俄以捐米議敘加知州銜二十四年調署蘄水其明年調署蘄州無何丁太宜人憂歸里以賑饑勞加同知銜尋由順天捐輸得知州咸豐二年揀發安徽是秋

善和州堅守年餘屢卻賊無何聞賊大至乃請援於是總兵
吳君全美率水師廬鳳道張君光第總兵劉君玉豹劉君鶴
翔率陸師先後至州君台練勇三萬人會剿分六班番上敗
賊駐馬河復敗賊張家集軍香泉賊不敢犯者數月會水師
西援賊犯香泉迎戰偏敗二劉沒於陣君與張君全師退賊
見有備乃去君在和三年首免賦稅以是得民心官紳民勇
如一家人君衣食有缺爭獻之比去鑑香繞道不絕六年移
六安州役蘇明等潛納捻首王守沅入城爲反期事覺掩斬
之獲鎗礮無算論功以同知直隸州留安徽補用

命下而君已及於難是歲大旱蝗人相食七年春皖撫奏撥
豫糧六千石送桐城營舟及潁上捻首李招壽將自鳳臺闕

曠集蔽之舟退而桐城營糧盡兵潰秦提督定三收殘卒退次六安君趨治廬帳五百具他軍裝稱是迎謁境上曰賊旦夕來某書生方思無以辦賊將軍至天生我六安民也願駐軍十五里鋪盪賊銜資糧屨屨惟某之責俄聞舒城賊且至秦一昔拔營去二月庚寅賊至君與參將喜瀛君懷甯縣長楓巡檢駱君秉彥等率五百人出城迎剿甫交兵聞城陷乃還次三十里鋪招合馬頭木廠鋪各鄉練勇彙集得萬數千人聲容甚壯丙申平旦進師二十里鋪賊迎戰敗之擒斬數百人轉戰而前至十五里鋪日昃止炊忽有萬餘賊自河西斷我後城中又出千騎衝我中權遂不支君親兵百人死者半賊望冠服所聚鎗矛全集君落馬遂與喜君駱君同遇害

隨丁張林逸距麥田數稜猶聞君厲聲呼殺賊云州人崔際唐等潛瘞君尸時肇元聞耗奔赴賊踞城不得前慟哭返其明年某月官兵收六安後刺史茅君念劬易棺斂之面色如生又明年正月肇元等乃克奉君喪歸丹旄及於淮而六安復陷既還吳以某月某甲子葬某縣某都圖某地之原君天性孝友弱冠失恃兄弟相繼逝泊奉太宜人官盡室偕行一庭怡怡早歲以詩文名志趣高簡不樂外職既居之不爲習移政暇跌宕文史翛然風塵之表己亥庚子癸卯甲辰四分校鄉試中額必倍他房嘗曰十年州縣此事差強人意泄經而後毅然以身許國在軍磨盾賦詩義形於詞文檇肇元兩省君於和制室陳率文梁至六安數月君皆趣之歸家

故中人產以宦游滅之既遂以身殉嗚呼君可謂無負矣君之死距城陷六日耳已劾矣既死乃復官君生於嘉慶五年五月甲申年五十有八著有曼陀羅室文集二十二卷花溪草堂詩集二十四卷先難作一月文梁齋其副歸故得完配賂宜人署安徽懷甯縣丞昶女秉彥其姪也生子文榜吳庠附貢生爲信兄其後擊元府庠附貢生襲世職文楣女一適直隸升用知州張際康側室陳生子文楫殤文梁遺腹希良女一銘曰

經術吏事端厥始累緝銅符楚江淚種棠成陰藹百里一朝儒巾易鞵弭談笑險巖等平砥三年危難烏江水移旆淖沙更痕瘠錦纏紅帕巾四鄙因之滿山倏蠲蟹褐父悲吟佩玉

蕊油囊大槩者誰子長驅貔貅去如駛南八當筵空斷指愜
愜窮城翳翳壘一呼瘡痍奮臂起枵腹殺賊賊披靡無何萬
賊聚蜂蟻兵單援濶勢不抵孤臣力竭辦一死

至尊震悼錫

溫旨疏爵紀庸表續似祠之春秋載之史丹心大節懷工祀
賜塋堂斧光有煒刻文貞珉華嶽峙

贈知府銜雲騎尉世職湖北揀發知縣無錫王君墓志銘
有纍然服喪踵吾門者視其謁則故人無錫王君之子庭楨
也延以入手狀拜稽顙泣而言曰先大夫死難某自京師匍
匐三千里入楚覓遺骸不得就殮難地招魂具衣冠奉之歸
將以某月日葬於某原以先仲兄變祔於昭惟念知先大夫
能爲文肖先大夫生平者無逾先生敢請銘且語且泣余亦
泣曰余尚忍銘君哉余始識君林文忠師節署越十餘年而
余奉先恭人諱南歸命變從余游間爲余言先人期望綦切
時乖運蹇連擯十一試年且老度無以慰先人地下輒嗚咽
無何余服闋君願偕行赴北闈余方爲子擇師年時一輩經
師人師莫君若欣然許諾於是與君共晨夕者兩年余尋丁

內艱去君先已舉京兆教習 宗學留都又三年而君之官
湖北道出吳門相見且曰余之得寸進者君力也未幾而君
赴至追憶前語殆難爲懷余尙忍銘君哉雖然於義不宜辭
按狀君諱恩綬字樂山號佩綸先世自金壇遷無錫給事中
虛舟先生樹其族祖也曾祖家錦祖濬父鼎汾候選從九品
祖父皆贈朝議大夫母趙恭人君幼慧年十有一隸試籍道
光元年王縣令履寵拔第一游庠尋食餼肄業吾吳紫陽書
院見賞於林文忠師招入署讀書公嘗謂余曰樂山古君子
也二十五年充 恩貢二十九年舉順天鄉試考取教習補
左翼宗學襍被學中三年訓諸生如家塾時惠邸奉

命稽查歎曰此職人皆視爲具文實做教習二字者王某一

人而已咸豐四年秋奉

旨以知縣用頃之湖北請揀發時選人以被兵之省爲畏途多謁假不往吏部爲之限假不得逾再君固新至得諤愷吏以爲言君笑拒之竟入選至則武昌方被圍不得入益陽胡文忠公以藩司督兵城外留君營中君不可率公子變及家丁丁貴吳福壽絕城入巡撫陶文節公歎曰今世乃有此人復令君就胡公營君又不可遂與武昌守多山君等五人誓死守明日而城陷晨烹聞文節縊於黃鶴樓君率公子變兩家人往賊大至與巷戰皆死之時五年春二月十七日也君生於嘉慶九年秋九月二十六日年五十有二次年冬官廩復武昌督撫上其狀

詔與公子變俱優卹 子祭葬雲騎尉世職祀昭忠祠 贈
君知府銜變主簿銜娶楊恭人國學生綬章女子七畱翔繼
兄後變原名變和字理齋號理堂寄籍宛平入學 實錄館
謄錄議敘候選從九品隨侍之楚君之縉城也誠勿從變涕
泣不可遂及於難性孝友家事一身任之不以累父兄諸弟
族黨服其才而廉謹則本於家教云庭楨乙卯科副榜世襲
雲騎尉廢陞旣庸立坊光治孫二鏡熙鏡煜世襲雲騎尉孫
女三君喜讀宋儒書以躬行實踐爲本一言笑不苟不取非
義財性好施家中落猶節嗇以拯人急工書畫詩文多散佚
殘稿藏於家秋捷之日館余寓竟夕泣有聲曰痛先人不及
見也在 宗學拜歲時衣米之

賜輒感激涕零慙無報稱人或哂之而君實出於至誠讀書
文忠署某牧令相與論山陽泰興雨闕之肥瘠吾吳故有三
陽泰興二肆君誤會爲二肆言文忠爲之撫掌有舟人兄弟
三人壯不娶君曰有三子而令絕祀大變也捐修羊助之君
之軼事多此類君之死也胡文忠聞跣足曰吾不能留此好
官吾過也與督部官文公請卹會疏有履險蹈危毫無趨避
父忠子孝足振頽風之語庭楨奔喪至奇賞之曰王君有子
矣奏留楚營待之甚厚君夙以忠義自矢賊之犯天津也京
師戒嚴君方居宗學鄉人招移外城不從嘗與人書曰大
丈夫遇此時勢與其老死牖下不如埋骨沙場赴楚伯兄送
之從容言有警勿徒死君曰誠然必手刃數賊而死人以爲

讖然則君之志在必死久矣或者謂傳曰大夫死眾又曰謀人之軍師敗則死之又曰城存與存城亡與亡於君皆不合君之死得無在可以死可以無死之列耶余曰不然孟子蓋謂臨難時擇於二者如曾子居武城晏子入崔氏之類與君所遇異其後城之既陷無所謂可以不死其先城之未陷逆料其陷而不入趨避孰大於是君不爲也時當謁撫部則謁時當入城則入城陷賊至又時當死則死曷嘗於死不死有絲毫計較審顧之心耶軍興以來死節之臣萬數或倉猝死窮蹙死或輾轉遲迴死其死同卽其忠同其有當死而死不待再計決者君子尤重之而君更出乎其上嗚呼至矣銘曰父死國子死父人畏途君樂土叱馭去餘勇賈衣冠墓九神

臨忠魂招何處所黃鶴樓屹千古

員外郎銜升用主事內閣中書潘君墓志銘

柳子厚之哭張後餘曰命之微不可知索於外者曰性與貌性良矣貌肅矣博碩宏裕宜爲大官耆老求其所以不然者而不得吾於同縣潘君禘之之喪而歎其言之適合也君諱希甫字保生禘之其號七世祖候選主事景文晚明由歛遷吳再傳至高祖膺貢生妣戴曾祖冕布政司理問妣汪兩世並以太傅大學士文恭公貴贈光祿大夫妣皆一品夫人祖奕雋乾隆己丑進士戶部貴州司主事重宴瓊林加四品卿銜 贈贈光祿大夫妣史一品夫人君家自京卿公首以進士起家有第二奕藻入翰林卒官郎中奕基寶生文恭公郡中謂之三潘蓋至是而族始大考世璜乾隆乙卯一甲三名

進士翰林院編修戶部浙江司主事祀鄉賢 授朝議大夫
妣陸封蒸人無子生妣袁 贈宜人生子二長編修遵祁次
卽君年十有六入吳庠尋食餼道光十五年舉鄉試二十三
年以例得內閣中書二十八年補闕咸豐二年 實錄館議
敘升用主事次年歸又五年卒君稟上資胚胎前光不離典
訓著有花隱菴詩詞若干卷在閣掌內制值 國家慶典有
大制作多推君爲之經進文字哀然成帙典麗有法度執事
實錄 國史 方略 玉牒四館與校

宣宗實錄蒙古王公表傳蒙古回部表重修一統志大臣傳
畫一本暨勘精審遂得協辦侍讀獲通本覆通本者總閱通
政司各直省章疏也進而覆部本爲真除侍讀之階當是時

君聲望蔚然更留一二年且敷歷中外而君翩然引去君器識端重懷抱經濟不表襮間出議論咸職體要大用之必有所設施知君者惜之既歸會軍興與團練敘勞得員外郎銜久之例再敘君力辭而輟君幼有至性連遭三喪盡哀盡禮如成人友愛甚篤君歸孟兄方修支譜建松麟義莊君贊助之遂因墓廬之舊葺西崦草堂數椽蒔花木春秋佳日呼小艇從孟兄往來西磧鄧尉間以爲樂初京卿公戶部公皆年未老告歸君兄之歸也尤早祖孫父子兄弟聯翩館閣乃仍世恬退習爲家風可謂賢矣君襟順而裏方慎交游絕奔競興居儉素無蒲酒之嗜勒呂新吾理欲循環圖於坐右生於嘉慶十六年四月十日卒於咸豐八年六月六日年四十有

九配嘉興查蒸人掌貴州道監察御史嘉慶戊辰進士元稱
女生於嘉慶十六年四月十一日卒於道光二十年五月二
十八日年三十子六介繁壬子舉人誠貴辛亥舉人皆候選
國子監學正學錄誠貴先卒敬寬殤念慈吳庠生思鞠殤勤
先女六殤其三汪懋椿吳乃健其婿也一未字孫三似穀宜
穀志裴孫女四側室余 貽封孺人劉褚查蒸人卒之明年
葬吳縣十三都下二圖宿字圩雙橋之原及是介繁等將以
咸豐九年月日奉君喪啟壙合祔先期遣信京師請銘於余
不獲辭銘曰

奚養之違不黃耆奚才之細不紫綬君之優游亦止壽君之
崇高天爵厚中年辭官繼廣受湛德凝栖侶驗友一門清尚

古罕有蘊宏施淺積彌久延此餘慶餉厥後我銘君藏期不
朽

浙江石浦同知張君墓志銘

代

按狀君諱祖基字某直隸人先世自灤州遷滄州遂占籍至八世祖子行公以明經官威縣教諭自是世以儒業顯曾祖某考授州同祖某武庠生父某庠生祖父皆贈如君官母劉宜人贈君年四十始生君少有異稟年十六補博士弟子員充辛酉科選拔貢生

朝考以知縣用分省浙江親老改山東歷署榮城濟陽黃縣事尋歸養家居十餘年既連丁內外艱意不復出久之知君者勸爲之駕乃以道光壬午待闕浙江甲申補常山兩載循聲大治旋引疾去去之日闔境皆流涕辛卯復起攝麗水始至屬臺灣民張丙爲亂檄處州兵會剿須餉萬金諸營刀裹

以待官中無所措君議令民預輸本年地丁錢糧以充之延紳士勸諭明無強勒意民感公誠應如響不二口餉遂足將發主兵之弁或失於馭則又大譁君爲諭止之得安堵歲饑開倉平糶以狀上大府不俟報而行之甲午再補常山父老聞君至皆迎郊外常山民多以爭山致訟君善方田術有訟者輒親視得其實吏莫能欺故終君任無爭山者尤善鎗法江小光目者巨盜也君手擒之置之法羣盜刷迹縣西門達於玉山有大道爲浙閩豫章水陸交輳地久不治君至而新之行旅頌焉乙未大旱君多方籌濟故浙省所在流離滿野而君所治無饑奉檄修海塘獨君所受功葳最早顧坐是貽累不貲丙申調烏程湖州爲漕賦要區自漕政積弊運丁多

方誅求於州縣則取償於民吏胥因緣爲姦利豪猾從而持短長相告訐甚則譁於庭由來久矣君至慨然曰爲民父母而忍以爲利乎縱不能一清積弊然減一分民受一分之福遂平減斗斛嚴束吏胥侵蠹民大悅丁酉秋調仁和戊戌計典大吏以卓異薦己亥春題升甯波府石浦同知未之任九月大水君以勘災得疾卒於官君居官講求實用不收聲譽寬催科嚴緝捕凡有利於民者無不爲性孝友敦睦嘗捐俸修族祖墓置祭田若干畝周卹親串惟力是視喜引掖後進先後教授於家中間服官齊越所獎拔成就多知名士今山西巡撫梁公萼涵其一也好經史性理之學晚頗涉獵於釋老之書久之覺其說終癡乃棄去嘗曰儒者當爲國家

興利除害於國計民生有所裨益不然則窮經研史發前人
所未發植綱常維世教斯爲有用之學詩文其末耳噫足以
見君之志矣君生於乾隆四十六年道光十九年十月五日
卒壽六十有九初娶王宜人繼娶某宜人前卒子一某丁酉
科挑取騰錄候選布政司經歷女五孫一王宜人先葬州之
張古風莊祖塋之次孤某將以道光二十三年二月十六日
奉君及某宜人之體合窆焉先期奉狀走京師請余銘銘曰
種棠浙水藹其蹟萬口成碑屹千尺洞然渾樸無瑕璧甲乙
方周反幽宅萬世之藏永無斲

資政大夫太常寺卿蕭山湯公墓志銘

惟蕭山湯氏遠有代序二十餘傳潛德不耀先師文端公始以理學文章經濟累踐大官游躋揆席肇開厥宗而祇道紹衣克繼其美者有若太常公公諱修字敏齋晚自號泔翁曾祖成德妣王華戴祖元裕妣來贈封並如文端公官考文端公金釧歷官吏部尙書協辦大學士 誥授光祿大夫妣來誥封一品夫人文端公二子長陝西鳳翔府知府寬公其次也以道光十九年舉京兆二十有三年例得內閣中書越三年補闕咸豐二年轉典籍其明年升侍讀記名御史補福建道監察御史轉掌雲南道尋遷順天府丞五年升通政司副使六年丁文端公憂變除補大理寺少卿擢太常寺卿無何

以疾去職訪醫南行自長沙至蘇州遂僑居焉同治十年四月辛巳卒年六十有一 誥授資政大夫公少端重不輕言笑善事父母侍立逾時不遷地文端公賢而愛之來夫人之卒也聞訃於南歸道中馳至慟絕寢饋柩側者三月急人之難爲人如爲己嘗曰旣爲之則善惡皆在己天下事豈有代人做者耶時以爲名言林文忠收繳薏船雅片一時稱誦謂烟患從此可絕公獨以不先講武備爲憂人服其遠見自政歸軍機內閣之屬涉筆占署而已公獨實事求是多所舉正見賞於祁文端公遂以議軍儲上啟累千言祁公不能用顧益重之廣東馮某叛奴過市場言其主與道員某通賊爲邏卒所誦逮馮某等下獄且置之死公以大學士檄與鞫無左

驗竟白其寃馮某來謝公叱之去曰吾爲公事耳非有私於若奚謝爲在諫垣遇事敢言棘棘不阿劾皖撫某以失守革員署缺奉

旨切責洎登卿寺疏陳各省團練事宜軍務各省變通開科津沽戰守之策多格於部議最後庚申之警有以北巡之說進者公聞之密疏力爭言詞激烈時尙書某與親王某相比貴盛用事公嘗忤尙書又屢言事遂積嫌公而

上則不以爲忤公語及

先帝知遇未嘗不歎

盛世易爲直臣嗚咽流涕也公自以大臣子由中書不數年躋三品世受

國恩奮身圖報以疾不久於位養疴中聞四方安危治忽輒
憂喜見辭色中道殂謝不盡其用朝野惜之疾革以遺疏授
紀尚訖訓之曰孝弟忠信做人根本語不及他文端公之學
訓詁宗漢儒窮理主敬以靜爲本則宗宋儒而歸宿在明體
達用公實承之嘗曰惟靜則艱難危苦時腳根立得定熟於
古名臣言行書通知時務胚胎前光孺染典訓一變世俗貴
介之習宋史稱司馬康云途之人見其容止雖不識皆知爲
司馬相公子也都門之於公亦然此必有睟然根於心生於
色者豈惟是車馬服御之懸迹已哉箸述多散佚存者奏疏
一卷古文一卷詩二卷隨筆四卷配定海葉氏 誥封夫人
海州直隸州知州機女繼南昌周氏 誥封夫人戶科給事

中春祺女適室羅氏子二紀尚縣學優廩生學喬後公數月卒女三長適頭品頂戴

弘德殿行走內閣學士翁同龢次適舉人趙曾重次未字孫女二紀尚以某年月日葬公於某原以葉夫人耐禮也憶已未歲余在都公以先師碑銘見屬匆匆南轅諾而未副迨今十餘年而以紀尚請泚筆銘公墓悲夫銘曰

公之系儒門相第一經引無替純仁得忠公其繼公之學探本闡洛不黜毛伏惟古訓是淑惟庭誥是服公之德玉瑩不飾石堅不叻不矜於翹不變於寂惟道是則公之文漢賈董之倫衡諸宋人匪葉伊陳卓乎經綸吉光彌珍中年從政外柔內勁溫溫其敬嶽嶽其諍結

主知惟正伎窮檢佞九遷臺省聲方盛待濟民艱圖報稱長
衢躑躅十年謝病憂時心獨恟謂公不遇官六命謂公已遇
施未竟纔周甲子歸雲鄉潔齊萬善公之藏令聞孔臧奕世
不忘我銘其彰之